

# «Memia pauca confidenza en il COI»

Reacziuns dals schefs da las fracziuns

■ **(anr/fa) Cun bundant 60 pertschient ha refusà il suveran ina candidatura grischuna per ils Gieus olimpics e paralimpics d'enviern 2026. La gronda maiortad dal cussegl grond aveva ditg gea a quista candidatura.** 85 pertschient da las deputadas e dals deputads al cussegl grond avevan sustegnì l'intenziun da la regenza grischuna da laschar elavurar ina candidatura per ils Gieus olimpics e paralimpics da l'onn 2026. Mo 40 pertschient da la populaziun grischuna han ditg dumengia gea a quest'intenziun. Tge din ils tschintg schefs da fracziun da questa gronda differenza, da questa discrepanza? Sa sentan els anc sco represchentants da la populaziun grischuna? L'anr ha discurre cun ils schefs da las fracziuns *Marcus Caduff* da la pcd, *Jan Koch* da la pps, *Rudolf Kunz* da la pld, *Gian Michael* da la pbd ed *Andreas Thöny* da la ps.

## Marcus Caduff

Il cussegl grond ha vis il project d'Olimpia sco ina schanza per l'economia chantunala. Uschia avessan ins pudì investir en infrastrukturas, en las qualas ins sto uschia u



ziun Grischun. Uss, cun il na dal suveran, vegnan quellas ad ir en in'otra direziun. La populaziun dentant ha giuditgà las ristgas sco pli grondas che las schanzas. Ina raschun è segir che la glied nun ha confidenza en il Comité Olympic Internaziunal (COI). Alura na san ins era betg calcular ils custs per la segirtad. La populaziun grischuna ha valità quai sco memia gronda ristga per il chantun. Quai che jau avess fatg d'emprim enà fiss stà dad infurmar da maniera pli transparenta ed offensiva, ma ins ha decis dad ir in'otra via, quai è uschia. Uss stuain nus guardar tgenins auters projects ed ideas che mainan vinavant il chantun.

## Jan Koch

Questa discrepanza hai dà causa ch'i nun è gartegià da mussar ils avantatgs a lunga vista ch'ina tala candidatura avess manà cun sai. Jau crai che la glied nun haja gi encltega che la politica chantunala iniezschia uschè curt suenter il na a l'Olimpiada en Grischun gia puspè ina candidatura olimpica. Era sche nus da la pps eran adina da l'avis ch'il project Olimpiada grischuna saja bun avain er nus crititgà quai. Il segund motiv è segir la tema dal gigantissem, in'occurrenza



simplamain memia gronda per il Grischun. I nun è gartegià da persuader ch'ins veglia ensem cun il COI gies pli pitschens. I manca simplamain la confidenza en il COI. Areguard la dumonda da politisar sper la populaziun via crai jau ch'i saja legitim da s'engaschar per insatge che para d'avantatg per il chantun. Uss ha la populaziun ditg na, uss èsi important da tschertgar cuminaivlamain ulteriurs projects a favur d'in svilup prosperavel da l'economia grischuna.

## Rudolf Kunz

Era sche la populaziun ha ditg na a la candidatura era tenor mai dretg ch'ins ha sutta-mess al suveran grischun la proposta da candidar per l'Olimpiada 2026. La lezia dal cussegl grond è numadamain dad empruvar differentas chaussas en chantun. Mintgatant gartegia quai e mintgatant betg. Sche nus fashain mo pli quai che nus savain che la maiortad da la populaziun sustegna, alura nun ans muventain nus pli. Nossas propostas po il pievel senz'auter era refusar, quai tutga tar la democrazia directa. Da las giadas gudognan ins, autras giadas na gartegia quai betg, quai tutga tar la politica. Il pli mal fiss sche nus nun empru-



vassan pli nagut. La raschun ch'il suveran ha ditg na vegn ad esser, crai jau, causa ch'ina Olimpiada fiss a l'avis dals bliers insatge memia grond per il Grischun. Nus però essan persvas ch'ils temps vegnan pli dirs. Ils Gieus olimpics na fissan betg stads il med universal per tut, els avessan dentant stgaffi la basa per survivor pli ditg.

## Gian Michael

Nus parlamentaris stuain avair era visions e far propostas a la populaziun per cuntanscher in avegnir economic prosperavel en chantun. Nus avain fatg la proposta d'approvar il project candidatura olimpica. Mo var 40 pertschient da la populaziun era da quel avis. Uss tschertgain nus autras vias per cuntanscher la finamira. Era sch'il na ch'igl ha dà dumengia era fitg cler ma sent jau anc adina sco represchentant dal pievel. D'avair ideas e da far propostas è noss duair, ed jau manegel che nus stoppian far da tuttas propostas e betg mo da quellas che nus essan quasi segirs ch'ellas vegnan era acceptadas. Ils motivs ch'il suveran grischun ha ditg na a la candidatura olimpica èn, crai jau, il gigantissem da las olimpiadas. San Murezzan vesa uss quant grond ch'igl èn gia ils Campiunadis



mundials da skis, ina Olimpiada fiss anc blier pli gronda. Perquai han ils da San Murezzan ditg na dumengia. E lura manca crai jau era la confidenza en il COI.

## Andreas Thöny

Sche tuts, era ils burgais, avessan pudì votar en il parlament propi tenor lur avis fiss il resultat, crai jau, stà sumegliant a quel da dumengia. Per ch'il project haja schanzas han ins però guardà che tuts burgais ditgian il medem. Dals bundant 60 pertschient che han refusà la candidatura nun eran tuts be da noss commembers, mabain er dad autras varts. Quai ha da far cun il sistem d'elecziun majorz. Il proporz manass ad in'otra rapreschentaziun en il parlament chantunal. Motivs che la populaziun ha ditg na èn segir ch'ins ha vuli sfurzar tras in'ulteriura candidatura olimpica, suenter mo trais onns ch'il suveran aveva refusà quai. Alura eran ins qua era malsegir, bliers detagls nun eran enconuschents, tgi fissan per exempel stads ils partenaris dal Grischun? Ed alura mancava segiramain la confidenza da la populaziun en il COI, la maiortad era da l'avis ch'ils gies fissian memia gronds per il chantun e finissian cun ina gronda perdita.

